



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

DREJTORIA E HETIMIT ADMINISTRATIV

Nr. 318/prot.
3

Tiranë më 15.9.2017

URDHËR

Nr. 227, datë 15.9.2017

PËR

SHKATËRRIMIN E TË DHËNAVE PERSONALE, TË CILAT KANË
TEJKALUAR AFATIN LIGJOR TË PËRPUNIMIT

Baza Ligjore: Ligji Nr.9887, datë 10.03.2008, “Për Mbrojtjen e të Dhënave Personale”,
i ndryshuar, nenet 29 dhe 30 të tij.

Në zbatim të Urdhrit Nr.159, datë 14.06.2017 të Komisionerit për të Drejtën e Informimit
dhe Mbrojtjen e të Dhënave Personale, u krye hetim administrativ pranë kontrolluesit *SOS
Fshatrat e Fëmijëve Shqipëri - Tiranë*, me objekt kontrolli:

- Zbatimi i Ligjit Nr.9887 datë 10.03.2008 “Për mbrojtjen e të dhënave personale” i
ndryshuar dhe akteve të miratuara nga Komisioneri, në lidhje me mbledhjen,
përpunimin, ruajtjen dhe sigurinë e të dhënave personale, gjatë kryerjes së aktivitetit
të kontrolluesit *SOS Fshatrat e Fëmijëve Shqipëri – Tiranë*.

Grupi i kontrollit, gjatë kryerjes së veprimeve procedurale, u asistua nga përfaqësuesit e
kontrolluesit, të cilët ishin njohur me Urdhrin Nr.159, datë 14.06.2017 të Komisionerit.

Kontrolluesi, *SOS Fshatrat e Fëmijëve Shqipëri - Tiranë*, (*SOS Kinderdorf*, organizata
mëmë), me NIPT: J62021005D, është subjekt juridik me aktivitet organizatë jo
fitimprurëse, duke ofruar shërbimin e kujdesit me bazë familjen për fëmijët që kanë
humbur kujdesin prindëror. Ky kontrollues, gjatë ushtrimit të veprimtarisë së tij,
përpunon të dhëna personale për subjektet e të dhënave “punëmarrës” e “fëmijë/të rinj”.

**Nga hetimi administrativ i kryer pranë këtij kontrolluesi, sipas proces verbalit të
mbajtur për këtë qëllim u konstatua:**

1. Nga verifikimi në regjistrin elektronik të kontrolluesve pranë Zyrës së
Komisionerit, kontrolluesi *SOS Fshatrat e Fëmijëve Shqipëri - Tiranë* e ka kryer
detyrimin për njoftim, por nuk ka kryer përditësimin e tij, konkretisht: rubrika 5.1 “Të
dhëna sensitive” (përkatësia fetare), rubrika 7.1 “Marrësi i të dhënave personale”,

rubrika 10.1 "Masat e sigurisë dhe politikat e ruajtjes së të dhënave personale", alternativa e dytë.

Konstatimi i pikës 1 të këtij procesverbali, përbën shkelje të nenit 21 dhe 22 të Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar, - "1. Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë".

2. Kontrolluesi SOS Fshatrat e Fëmijëve Shqipëri - Tiranë, nuk ka një rregullore të mirëfilltë për mbrojtjen e të dhënave personale, përveç nenit 32 të Rregullores së Brendshme të tij, si dhe udhëzimit specifik mbi "Politika për përdorimin e sistemit & aksesit".

Konstatimi i pikës 2 të këtij procesverbali, përbën shkelje të nenit 27 të Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar, - "1. Kontrolluesi

ose përpunuesi merr masa organizative dhe teknike të përshtatshme për të mbrojtur të dhënat personale nga shkatërrime të paligjshme, aksidentale, humbje aksidentale, për të mbrojtur aksesin ose përhapjen nga persona të paautorizuar, veçanërisht kur përpunimi i të dhënave bëhet në rrjet, si dhe nga çdo formë tjetër e paligjshme përpunimi.

2. Kontrolluesi merr këto masa të veçanta sigurie:

2/1. Kontrolluesi është i detyruar të dokumentojë masat tekniko-organizative të përshtatura dhe të zbatuara për garantimin e mbrojtjes së të dhënave personale, në përputhje me ligjin dhe rregulloret e tjera".

3. Kontrolluesi SOS Fshatrat e Fëmijëve Shqipëri - Tiranë, në formularin tip, "Kërkesë për hyrjen e një fëmije në SOS Fshatrat e Fëmijëve" Shqipëri - Tiranë, kapitulli I. "Fëmija" dhe kapitulli II. "Nëna e Fëmijës", mbledh të dhëna sensitive të kategorisë "Përkatësia fetare", kategori e cila në kuptim të nenit 5 germa "c" e tejkalon qëllimin e përpunimit.

Konstatimi i pikës 3 të këtij procesverbali, përbën shkelje të nenit 5 të Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar, - "1. Mbrojtja e të dhënave personale bazohet:

c) në mjaftueshmërinë e të dhënave, të cilat duhet të lidhen me qëllimin e përpunimit dhe të mos e tejkalojnë këtë qëllim;"

4. Kontrolluesi SOS Fshatrat e Fëmijëve Shqipëri - Tiranë, nuk ka publikuar në portalin zyrtar të tij "Politikat e Privatësisë". Informacioni i publikuar në "Politikat e Privatësisë", ka për qëllim informimin e subjekteve që vizitojnë këtë portal, mbi mënyrat e përpunimit të të dhënave, masat e sigurisë, ruajtjes së konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

Konstatimi i pikës 4 të këtij procesverbali, përbën shkelje të nenit 18 të Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar, - "1. Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t'i përpunojë të dhënat, për mënyrën e përpunimit, përveç rastit kur subjekti i të dhënave është në dijeni të këtij informacioni. Kontrolluesi duhet

të informojë subjektin e të dhënave për të drejtën për akses, si dhe të drejtën për korrigjim të të dhënave të tij.

2. Në rast se kontrolluesi përpunon të dhëna personale, të marra nga subjekti i të dhënave, ai është i detyruar të informojë subjektin e të dhënave nëse dhënia e të dhënave personale është e detyrueshme apo vullnetare. Nëse subjekti i të dhënave, në bazë të një akti ligjor ose nënligjor, është i detyruar të japë të dhëna personale për përpunim, kontrolluesi e informon edhe rreth këtij fakti, si dhe rreth pasojave të refuzimit të dhënies së të dhënave personale”.

5. Kontrolluesi SOS Fshatrat e Fëmijëve Shqipëri - Tiranë, ka disa rregulla dhe formularë mbi konfidencialitetin, për punëmarrës dhe vizitorë, por këto formate nuk kanë standardin e Deklaratës së Konfidencialitetit sipas Vendimit Nr.6 datë 05.08.2013 të Komisionerit, ku parashikohen: **Objekti, qëllimi, fusha e veprimit, masat për shpërdorimin e tyre, si dhe nënshkrimin e punëdhënësit.**

Konstatimi i pikës 5 të këtij procesverballi, përbën shkelje të nenit 28 të Ligjit Nr.9887, datë 10.03.2008, “Për Mbrojtjen e të Dhënave Personale” i ndryshuar, - *“Kontrolluesit, përpunuesit dhe personat, që vihen në dijeni me të dhënat e përpunuara, gjatë ushtrimit të funksioneve të tyre, detyrohen të ruajnë konfidencialitetin dhe besueshmërinë edhe pas përfundimit të funksionit. Këto të dhëna nuk përhapen, përveç rasteve të parashikuara me ligj”.*

Pika 3 e procesverballit, konsiston në mbajtjen e dosjeve me të dhëna personale sensitive të përfitueseve, *më tepër se sa është e nevojshme për qëllimin, për të cilin ato janë grumbulluar ose përpunuar më tej.* Këto dosje, përmbajnë të dhëna me karakter vetjak dhe sensitiv, të cilat cenojnë jetën private të fëmijëve kur ato mbahen në afate të papërcaktuara edhe pasi ka mbaruar qëllimi për të cilin këto të dhëna janë mbledhur.

Zyra e Komisionerit pas përfundimit të procedurës së kontrollit, ka dalë me aktin rekomandues, Nr.30, datë 17.07.2017, në lidhje me shkeljet sipas pikave të procesverballit të mësipërm, ku ndër të tjera shprehet:

“Në zbatim të nenit 5, germa “d” të Ligjit Nr.9887, datë 10.03.2008 “Për Mbrojtjen e të Dhënave Personale” i ndryshuar, kontrolluesi SOS Fshatrat e Fëmijëve Shqipëri - Tiranë, të parashikojë në rregulloren për “Mbrojtjen, Përpunimin, Ruajtjen dhe Sigurinë e të Dhënave Personale”, afatet ligjore të ruajtjes së të dhënave personale (dosjet) e përfituesve “fëmijë/të rinj”.

Neni 3 “Përkufizime”, pika 4 i Ligjit Nr.9887, datë 10.03.2008, “Për Mbrojtjen e të Dhënave Personale” i ndryshuar, përcakton se:

“Të dhëna sensitive” është çdo informacion për personin fizik, që ka të bëjë me origjinën e tij, racore ose etnike, mendimet politike, anëtarësimin në sindikata, besimin, fetar apo filozofik, dënimin penal, si dhe të dhëna për shëndetin dhe jetën seksuale”.

Ruajtja e dosjeve të fëmijëve, pa një afat të caktuar edhe pasi ka mbaruar qëllimi për të cilin ato janë mbledhur, përbën shkelje të kësaj të drejte themelore të tyre.

E drejta e tyre për privatësi sanksionohet gjithashtu, në nenin 17 të Ligjit Nr.18/2017, “Për të Drejtat dhe Mbrojtjen e Fëmijës”, pika 2 citon:

“2. Privatësia e fëmijës mbrohet në të gjitha situatat, përfshirë ato brenda familjes, institucioneve të kujdesit shëndetësor, shoqëror e të shërbimeve. Kjo e drejtë përfshin privatësinë e marrëdhënieve e të komunikimeve me të tjerët, të drejtën për këshillim konfidencial, kontrollin e aksesit në informacionin që ruhet për fëmijët në dosjet përkatëse”.

Në konsultimet paraprake që Zyra e Komisionerit ka zhvilluar me palët e interesuara, është konkluduar se afati i mbajtjes së dosjeve të *“fëmijë/të rinj”*, nuk duhet të jetë më shumë se 10 vjet nga dalja e *“fëmijë/të rinj”* prej qendrës, duke marrë parasysh dhe monitorimin afatgjatë të tyre pas daljes nga qendra e trajtimit.

Zyra e Komisionerit vlerëson rëndësinë e mbrojtjes së të dhënave personale, konkretisht të fëmijëve, përpunimi i paligjshëm i të cilave sjell pasoja të pariparueshme të jetës dhe privatësisë së tyre.

Neni 30, paragrafi 1, germa *“b”* e Ligjit Nr.9887, datë 10.03.2008 *“Për Mbrojtjen e të Dhënave Personale”* i ndryshuar, përcakton se:

“Komisioneri ka këto të drejta:

b) urdhëron bllokimin, fshirjen, shkatërrimin ose pezullon përpunimin e paligjshëm të të dhënave personale”.

Sa më sipër, në zbatim të neneve 5, 7, 29, 30 pika 1, germa *“b”* dhe 32 të Ligjit Nr.9887, datë 10.03.2008 *“Për Mbrojtjen e të Dhënave Personale”* i ndryshuar,

URDHËROJ:

1. Kontrolluesi *SOS Fshatrat e Fëmijëve Shqipëri* - Tiranë, të realizojë në mënyrë të menjëhershme, pezullimin e përpunimit të të dhënave personale (dosjet) e subjekteve të të dhënave, kategoria *“fëmijë/të rinj”*, që kanë mbi 10 vjet nga përfundimi i qëllimit për të cilin janë mbledhur.
2. Kontrolluesi *SOS Fshatrat e Fëmijëve Shqipëri* - Tiranë, të parashikojë në rregulloren për *“Mbrojtjen, Përpunimin, Ruajtjen dhe Sigurinë e të Dhënave Personale”*, afatin 10 vjeçar të mbajtjes së dosjeve të *“fëmijë/të rinj”*, pas daljes së tyre nga qendra e trajtimit.
3. Kontrolluesi *SOS Fshatrat e Fëmijëve Shqipëri* - Tiranë, të realizojë seleksionimin e dosjeve që disponon, deri në klasifikimin dhe verifikimin e saktë të tyre si:
 - a. Të dhëna personale (dosje) të ruajtura në përputhje me afatet ligjore.
 - b. **Të dhëna personale (dosje) të ruajtura në shkelje të afateve ligjore.**
4. Kontrolluesi *SOS Fshatrat e Fëmijëve Shqipëri* - Tiranë, pasi të ketë vepruar sipas pikave 1, 2 dhe 3 të këtij urdhri, të realizojë shkatërrimin e të gjitha të dhënave personale sensitive (dosje) të arkivuara në kundërshtim me afatet ligjore, brenda një periudhe 60 (gjashtëdhjetë) ditore.

5. Kontrolluesi *SOS Fshatrat e Fëmijëve Shqipëri* - Tiranë, mbart detyrimin për të njoftuar Zyrën e Komisionerit, lidhur me zbatimin e detyrave të lëna në këtë urdhër, brenda 60 ditëve.
6. Në rast mospërbushje të këtij detyrimi, Komisioneri vepron sipas nenit 30/2 dhe 39 të Ligjit Nr.9887, datë 10.03.2008 “Për Mbrojtjen e të Dhënave Personale” i ndryshuar. Komisioneri në rast shkeljesh serioze të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të rekomandimeve të tij, vendos sanksion administrativ me gjobë dhe e denoncon publikisht ose e raporton çështjen në Kuvend dhe në Këshillin e Ministrave.

Ky urdhër u shpall sot më, 15/9/2017

KOMISIONERI
Besnik Dervishi
Besnik Dervishi

